



Inatsisartuni ilaasortat SIUMUT

Annertuumik innarluutilinnut ilinniartitaanikkut neqeroorutit pillugit Inatsisartut suleriaasianni § 37 naapertorlugu apeqquteqaammut akissut

25-08-2015
Suliap nr. 2015 - 7757
ID. nr. 970126
Postboks 1029
3900 Nuuk
Tlf: +299 34 50 00
Fax: +299 32 20 73
Email: ikiin@nanoq.gl
www.nanoq.gl

Asasakka inatsisartuni Siumup ilaasortaataitai.

Annertuumik innarluutilinnut ilinniartitaanikkut neqeroorutit pillugit apeqqutigisassinnut qujavunga.

Naalakkersuisut Ilinniartitaanermut Pilersaarutaanni Il-mi ilaapput innuttaaqataasunut innarluutilinnut suliniutissanut pilersaarutit, taakkua inunnut, isumaginninnikkut aamma fagitigut assigiinngitsutigut piginnaanngorsarneqarnissaat siunertaralugu, suliffeqarnermi peqataalersinniarnarat siunertaralugu. Pilersaarutaavoq innarluutillit ilinniartitaanerni suli annertunerusumik peqataatinneqalernissaat.

Taamaattumik Naalakkersuisut isumaqatigaat nunatsinni innarluutilinnut immikkut aaqqissuussaasunik pitsaanerusunik ilinniartitaanikkut neqerooruteqalernissaa.

Suliap tamatuma ilaa ilinniarnertuunngorniartarnermik 2012-imi aaqqissuusseqqinnermut ilaavoq, takuuk Ilinniarnertuunngorniartarneq pillugu Inatsisartut inatsisaat nr. 13, 22. november 2011-meersoq. Tassani allannguut eqqunneqarpoq, inatsisitigut periarfissaalermat ilinniarfiit ataasiakkaat annertunerusumik aaqqissuussisinnaanerat, ilinniagaqartunut innarluutilinnut atatillugu, takusigit inatsimmi pineqartumi §§-it 42 aamma 43. Tamatumani assersuutigalugu ilinniartitaanerup sivitsorneqarsinnaaneranut periarfissaq, imaluunniit isumannaarumallugu ilinniagaqartut immikkut ittunik aaqqissuussinernik pisariaqartitsisut neqeroorfigineqartarnissaat. Kiisalu aamma ilinniagaqartunut inissialiortiternerni ilinniarfiliornernilu ilanngullugu isumagineqartarpoq ilinniagaqartut ilaasa timimikkut innarluuteqartuusinnaanerat.

Inuussutissarsiutinik ilinniartitaanernut inatsisit atuuttut naapertorlugit, takuuk Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerat pillugit Inatsisartut inatsisaanni nr. 10, 19. maj 2010-meersumi § 1, Naalakkersuisut isumannaartussaavaat inuusuttut tamarmik inuussutissarsiutinut ilinniakkamik aallartitsiniartut imaluunniit pikkorissarniartut kissaataasa

naammassineqartarnissaat. Tamannalu isumaqarpoq innarluutillit inuusuttut aamma sullinneqassasut.

Maannamut innarluutilinnut sammititaasunik immikkut aaqqissuussanik ilinniartitaanernik aaqqissuussisarnerit eqqarsaatigalugit annikitsuinnarnik misilittagaqartoqarpoq.

Ullutsinni innarluutileqareerpoq ilinniartitaanermik iluatsilluartumik naammassisaqarsimasunik, assersuutigalugu qamutunik ajattartakkanik atuisoq, KTI-mi ilinniakkami tiguneqarnikummat ilinniakkamillu naammassinnilluni. Pisimasuni taamaattuni, ikittuinnannguugaluartunilu ilinniarfiit pineqartumut naleqqussakkamik aaqqissuussisarput.

Tassalu annertuumik pisariaqartitsisoqarpoq misissuinerneq tunngaviusunik assigiinngitsunik, ilaatigut innarluutillit qanoq amerlatiginersut periarfissaqartut pisariaqartitsillutillu ilinniagaqarnissamut eqqarsaatigalugu, aammali qanoq innarluuteqarnertik tunngavigalugu ilinniagaqarnissamut periarfissaqartunik.

Aammattaaq pisariaqartinneqarpoq nalilersussallugu ilinniartitsisut ilinniartitaanerni ilisimasaqarfiusussat tamaasa eqqarsaatigalugit ilinniartitsisinnaasunik pisariaqartitsineq, kiisalu eqqumaffigissallugit suleqatigiinnissamut periarfissat, suliasaqarfinni kommuninit akisussaaffigineqartuni, innarluutilinnut ataasiakkaanut ilinniartitaanermik aallartitsisinnaaneq eqqarsaatigalugu.

Taamaattumik Naalackersuisut kissaatigaat periarfissanik misissuinnissaq, aamma pisariaqartitsinermik aningaasartuutissallu eqqarsaatigalugit, innarluutilinnut ilinniarfiusinnaasut tamaasa eqqarsaatigalugit pitsanngorsaataasinnaasunik, - tamatumani aamma maanna periarfissaareersut avataasigut annertuumik innarluutilinnut periarfissat eqqarsaatigalugit.

Allatut oqaatigalugu sammiviit assigiinngitsut qulaajarneqaaqqaartariaqarput, innarluutilinnut ilinniakkanik pilersitsinnginnermi, - tassami, immikkut ilinniartitaanerni neqeroorutit imaluunniit inunnut ataasiakkaanut naleqqussakkamik ilinniartitaanerit pilersaarusiorneqarsinnaapput, neqeroorutigineqarsinnaallutillu.

Taamaattumik Naalackersuisut suleqatigiissitaliamik pilersitsiniarput, siuliani sammineqartunik qulaajaasussamik inassuteqaatinillu suliaqartussamik, inunnut ataasiakkaanut ilinniartitaanermut pilersaarutunik suliaqarsinnaaneq eqqarsaatigalugu, taamalu ilinniagaqarnissamut periarfissaqalersitsisoqarsinnaaqqullugu. Suleqatigiissitarlu ungasinngitsukkut siuliani pineqartut pillugit inassuteqaatinik saqqummiussaqaassaaq.

Suleqatigiissitap suliassaani innarluutilinnut Aspergers syndromimik nappaatilinnut aammalu soorunami allanik innarluutilinnut ilinniagaqarnissamut periarfissat qulaajarneqassaput.

Naalakkersuisut piffissami matumani innarluutilinnut ilinniartitaanikkut neqeroorutaajumaartunut aningaasartuutit annertussuserisinnaasaat akissuteqarfigisinnaanngilaat, Naalakkersuisut aningaasartuutissat annertussuserisinnaasaannut sanilliussassaqaqngimmata. Taamaattumillu apeqqut suleqatigiissitap eqikkaaneratigut ajornartorsiummillu qulaajaaneratigut akissuteqarfigineqarumaarpoq.

Inussiarnersumik inuulluaqqusillunga
Med venlig hilsen

Nivi Olsen